

**BOSNA I HERCEGOVINA**  
*Konkurencijsko vijeće*



**БОСНА И ХЕРЦЕГОВИНА**  
*Конкуренијски савјет*

## **ZAKLJUČAK**

**Sarajevo**  
**maj, 2017. godine**



Broj: 04-26-3-030-30 -II/16  
Sarajevo, 08.05.2017. godine

Konkurencijsko vijeće Bosne i Hercegovine, na osnovu člana 25. stav (1) tačka e) Zakona o konkurenciji („Službeni glasnik BiH“, br. 48/05, 76/07 i 80/09) i člana 122. st. (1) i (2) Zakona o upravnom postupku („Službeni glasnik BiH“, br. 29/02, 12/04, 88/07, 41/13 i 40/16) u predmetu koji se vodi na osnovu Zaključka o pokretanju postupka broj: 04-26-3-030-8-II/16 od 24.01.2017. godine donesenom po Zahtjevu za pokretanje postupka privrednog subjekta „Telemach“ d.o.o. Sarajevo, Džemala Bijedića broj 216, 71000 Sarajevo, zastupan po Nihadu Sijerčiću, advokatu iz Sarajeva, protiv privrednih subjekata „Tibra – Pacific“ d.o.o. Kiseljak, Josipa Bana Jelačića bb, 71250 Kiseljak, „Nova Otoka“ d.o.o. Kiseljak, Josipa Bana Jelačića bb, 71250 Kiseljak, „BH Telecom“ d.d. Sarajevo, Franca Lehara 7, 71000 Sarajevo i „Logosoft“ d.o.o. Sarajevo, Igmanska 9, 71000 Sarajevo, radi utvrđivanja postojanja zabranjenog sporazuma, na 2. (drugoj) sjednici održanoj dana 08.05.2017. godine, donijelo je

## **Z A K L J U Č A K**

1. Postupak se obustavlja.
2. Ovaj Zaključak je konačan i bit će objavljen u „Službenom glasniku Bosne i Hercegovine“, službenim glasilima entiteta i Brčko Distrikta Bosne i Hercegovine.

## **O b r a z l o ž e n j e**

Konkurencijsko vijeće Bosne i Hercegovine (u daljem tekstu: Konkurencijsko vijeće) je dana 26.08.2016. godine pod brojem: 04-26-3-030-II/16 zaprimilo Zahtjev za pokretanje postupka (u daljem tekstu: Zahtjev) privrednog subjekta „Telemach“ d.o.o. Sarajevo (u daljem tekstu: Podnosilac zahtjeva ili „Telemach“) protiv privrednih subjekata „Tibra – Pacific“ d.o.o. Kiseljak, Josipa Bana Jelačića bb, 71250 Kiseljak (u daljem tekstu: „Tibra“), „Nova Otoka“ d.o.o. Kiseljak, Josipa Bana Jelačića bb, 71250 Kiseljak (u daljem tekstu: „Nova Otoka“), „BH Telecom“ d.d. Sarajevo, Franca Lehara 7, 71000 Sarajevo (u daljem tekstu: „BH Telecom“) i „Logosoft“ d.o.o. Sarajevo, Igmanska 9, 71000 Sarajevo (u daljem tekstu: Logosoft“), radi utvrđivanja postojanja zabranjenog sporazuma u smislu člana 4. Zakona o konkurenciji („Službeni glasnik BiH“, br. 48/05, 76/07 i 80/09).

Podnosilac zahtjeva je dopunio Zahtjev podneskom brojem 04-26-3-030-1-II/16 dana 07.09.2016. godine i podneskom broj: 04-26-3-030-5-II/16 dana 24.11.2016. godine.

Uvidom u podneseni Zahtjev i dopune Zahtjeva, Konkurencijsko vijeće je utvrdilo da je isti kompletan, te je Podnosiocu zahtjeva u skladu sa članom 28. stav (3) Zakona izdalo Potvrdu o prijemu kompletnog i urednog Zahtjeva, broj: 04-26-3-030-6-II/16 od 24.01.2017. godine.

Podnosilac zahtjeva smatra da je došlo do zaključivanja zabranjenog sporazuma između privrednih subjekata „Tibra“, „Nova Otoka“, „BH Telecom“ i „Logosoft“, sa negativnim efektima na relevantnim tržištima vezanim za pružanje telekomunikacionih usluga krajnjim korisnicima (stanarima) u Sarajevu u okviru stambeno – poslovnog kompleksa „Nova Otoka“ i to na tržištu distribucije audio – vizuelnih medijskih sadržaja, pristupa Internetu i fiksne telefonije.

Pod uslugom distribucije audio – vizuelnih medijskih sadržaja“ Podnosilac zahtjeva podrazumijeva audio – vizuelni sadržaj koji se distribuira putem CATV i IPTV tehnologije, jer smatra da DTH satelitska platforma, kao tehnologija za distribuciju medijskog sadržaja, nije zamjenjiva sa druge dvije tehnologije (kablovska i IPTV) iz razloga što se kod DTH tehnologije radi o jednosmjernom prenosu, koji ne može biti povezan sa uslugama Interneta ili fiksne telefonije, te za razliku od kablovske TV i IPTV-a, DTH ne podržava moderne televizijske tehnologije, kao što su interaktivna TV ili VoD.

U skladu sa naprijed navedenim Podnosilac zahtjeva je zatražio da Konkurencijsko vijeće donese zaključak o pokretanju postupka protiv privrednih subjekata „Tibra“, „Nova Otoka“, „BH Telecom“ i „Logosoft“ zbog zaključenja zabranjenog sporazuma u smislu člana 4. Zakona, jer postoji osnovana sumnja da Protivne strane značajno sprečavaju, ograničavaju odnosno narušavaju tržišnu konkurenciju.

Podnosilac zahtjeva je predložio da Konkurencijsko vijeće utvrdi da su Protivne strane zaključile zabranjeni sporazum odnosno da su ograničile proizvodnju, tržište ili tehnički razvoj u smislu člana 4. stav (1) tačka b) Zakona, te da su primijenile različite uslove za identične transakcije s drugim privrednim subjektima, dovodeći ih u nepovoljan položaj u odnosu na konkurenciju u smislu člana 4. stav (1) tačka d) Zakona.

U vezi sa navedenim, Podnosilac zahtjeva predlaže da Konkurencijsko vijeće, pored eventualnog izricanja novčane kazne u smislu člana 48. Zakona, naloži Protivnim stranama da svoje ponašanje na tržištu usklade sa odredbama Zakona, te prekinu sa daljim kršenjem istog, odnosno da omoguće priključak stambeno – poslovnog objekta „Nova Otoka“ na telekomunikacionu mrežu svih zainteresovanih operatera pod fer i transparentnim uslovima.

Na osnovu dostavljenih podataka i dokumentacije Konkurencijsko vijeće je ocijenilo da nije moguće bez provedenog postupka utvrditi postojanje povreda Zakona na koje Podnosilac zahtjeva ukazuje, te je dana 24.01.2017. godine donijelo Zaključak o pokretanju postupka broj: 04-26-3-030-8-II/16.

Konkurencijsko vijeće je, u skladu sa članom 33. Zakona, Zahtjev i Zaključak o pokretanju postupka dana 25.01.2017. godine dostavilo na odgovor privrednom subjektu „Tibra“ (akt broj: 04-26-3-030-13-I/16), privrednom subjektu „Nova Otoka“ (akt broj: 04-26-3-030-14-I/16), privrednom subjektu „BH Telecom“ (akt broj: 04-26-3-030-15-I/16), privrednom subjektu „Logosoft“ (akt broj: 04-26-3-030-16-I/16)

Zaključak je također dostavljen i Podnosiocu zahtjeva aktom broj: 04-26-3-030-12-I/16 od 24.01.2017. godine.

Dana 24.03.2017. godine Podnosilac zahtjeva je podneskom zaprimljenim pod brojem: 04-26-3-030-27-II/16 obavijestilo Konkurencijsko vijeće da odustaje od Zahtjeva s obzirom da mu se nakon donošenja Zaključka o pokretanju postupka obratio privredni subjekt „Nova Otoka“ sa ponudom za zaključenje ugovora koji po njihovim navodima sadrži iste uslove kao ranije zaključeni ugovori sa privrednim subjektima „BH Telecom“ i „Logosoft“.

Podnosilac zahtjeva je ponudu prihvatio i dana 24.03.2017. godine zaključio ugovor sa privrednim subjektom „Nova Otoka“, čime su razlozi zbog kojih je podnio Zahtjev otklonjeni, te isti nema pravni interes za dalje vođenje i sudjelovanje u predmetnom postupku.

U skladu sa članom 122. stav (1) Zakona o upravnom postupku, stranka može odustati od svog zahtjeva tokom cijelog postupka, a u skladu sa stavom (2) istog člana, kada je postupak pokrenut povodom zahtjeva stranke, a stranka odustane od svog zahtjeva, organ koji vodi postupak donijet će zaključak kojim se postupak obustavlja.

U skladu sa naprijed navedenim odlučeno je kao u dispozitivu.

**Pouka o pravnom lijeku**

Protiv ovog Zaključka nije dopuštena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objavljivanja ovog Zaključka.

**Predsjednica**

**mr. Arijana Regoda - Dražić**